

**NATIONAL ASSEMBLY OF
SEYCHELLES**

Thursday 22nd February, 2024

The Assembly met at 16pm

National Anthem

Moment of Reflection

Mr Speaker in the Chair

MR SPEAKER

Leader Biznes Gouvernman dan Lasanble Nasyonal. Manm Onorab Lasanble Nasyonal. Zofisye Lasanble Nasyonal. Tou bann ki'n kapab zwenn nou osi ozordi pour sa sesyon. Nou bann envite dan Galeri e tou manm piblik ki pe swiv nou ozordi. Mon swet zot tou byenveni pou louvertir Lasanble Nasyonal pou lannen 2024.

En byenveni spesyal pou bann envite dan Galeri ki enkli manm lafanmir e bann pros ansyen Onorab Rosie Bistoquet.

Sa seremoni louvertir Lasanble i en moman solannel pou mwan, ki permet mwan reflesir lo nou travay e plas nou lenstitisyon dan nou pei. I donn mwan lokazyon pou adres detrwa mo lo nou misyon koman en brans nou Gouvernman e pour Lepep Seselwa.

2024 i katriyenm lannen dan term nou Lasanble ki nou apel nou Lasanble. Alors en mazorite nou letan in fini pase e in pas vit.

I sanble zis detrwa mwan ki nou ti zwenn pou premye fwa le 28 Oktob, 2020. Dan sa 3 lannen ki'n pase nou Lasanble in ranpli son rol dan governans nou pei e i mon swe ki nou a kontinyen pour sa letan ki reste. Travay avek devouman, avek tou nou kouraz pou reste fidel anver nou nasyon.

Nou re pran travay apre serten moman difisil ki nou nasyon in pas ladan resaman. E sa i rapel nou ki lavi i annan sa bann moman ki teste nou kouraz. Me ki devret fer nou vin pli for. Bann lensidan le 7 Desanm, 2023 avek en katastrof klimatik dan Nor Mahe e lensidan leksplozyon dan distrik Cascade in fer nou termin dernyen lannen dan en fason tris.

Ankor enn fwa mon eksprim nou solidarite e sipor pou tou nou sitwayen ki'n pas dan sa letan difisil. Mon oule sirtou salye kouraz e rezilyans bann ki'n fer tou pou re konstri zot lakaz oubyen zot landrwa biznes e pou re pran zot lavi normal parey i ti ete avan sa lensidan.

Mon osi salye ankor enn fwa tou bann ki'n vin devan

pou anmenn led ek sipor kot zot kapab.

Mon servi sa lokazyon pou not rol nou bann Manm Lasanble ki'n angaze dan zot distrik. I en temwannayaz responsabilite ki Manm Lasanble i pran ler zot pran sa pozisyon pour avek zot manm dan zot distrik. Manm piblik dan zot distrik ler i nesese e ler zot bezwen sa sipor.

Mon felisit egalman tou bann lezot ki'n vin la pou anmenn soutyen, lankourazman e led kot zot kapab. E ladan i annan serten manm sekretarya nou Lasanble ki'n pran en par dan sa zefor menm si i pa ti zot responsabilite.

Ver lafen lannen nou'n pas dan en lot moman tre douloure avek lanmor trazik nou koleg desede Onorab Rosie Bistoquet. Mon remersye tou dan Lasanble e an deor Lasanble ki'n vin ansanm pou eksprim respe e senpati solidarite avek son fanmir. Ozordi son fanmir pros in zwenn nou pou rann en omaz ofisyel ansyen Onorab Rosie Bistoquet.

Me kantmenm nou'n pas dan sa bann moman difisil, lannen 2023 i osi merit ganny selebre pou travay ki nou'n fer. Lasanble in ranpli latas ki Konstitisyon nou pei in donn li. Nou'n pas Lalwa ki nesese pou gouvrenans nou pei.

Nou'n anmenn kestyon lo polisi e program Legzekitiv e nou'n adopte Mosyon ki'n aport pwennvi e sizesyon Lasanble lo bann size nasyonal.

Lalwa, Lasanble in pas 32 an 2023. Parmi plizyer ki annan lenplikasyon enportan pour nou nasyon.

Kestyon, Manm in prezant 237 pour tou bann Minis, lo en gran varyete size ki tonm anba zot responsabilite.

Mosyon i annan 30 ki'n vin devan Lasanble enkli bann lo Trete e Konvansyon Enternasyonal ki nou Gouvernman pe adopte.

Mon pa bezwen dir bokou lo nou travay isi dan lasal. Piblik Seselwa in swiv nou fidelman e zot konnen ki nou'n fer. Me par kont mon bezwen mansyonn kontinyelman osi sa ki nou fer an deor lasal e an deor batiman Lasanble.

Bann Komite Lasanble in reste aktiv dan sa dernyen lannen e mon pran lokazyon pou felisit zot pour zot travay. Travay komite i fer en pon ant travay Legzekitiv e avek nou piblik an deor travay bann rankont ki sa bann komite i fre lo siz eki dan zot manda.

Mon konstata ki depi 2020 sa travay in enn ki'n pran plis lanpler. Mon'n vwar bann komite vin pli aktiv e pli

angaze. Menm Manm ki fer par dan sa bann komite ki liye avek bann lorganizasyon rezyonal e enternasyonal, in osi kontinyen zot langazman.

Mwan prosen nou pou annan en seremoni pou sinyatir renouvelman nou lakor avek forum Parlmanter SADC. Se sa partenarya i sport en varyete aktivite dan domenn lasante ki nou Lasanble i angaze ladan.

Lo kote administrativ nou'n fer en zefor pou siport travay bann komite pli byen e mon kontan ki sa lannen nou'n ganny en pe plis larzan dan bidze pou siport zot direkteman. E osi nou'n ganny en adisyon 5 post dan Sekretarya pou anploy zofisye ki pou servi zot koman sekreter e donn sipor administrativ.

Sa i a ede servi sa bann komite pli byen e rann zot pli efektiv. Ler mon felisit bann komite, mon bezwen fer en mansyon spesyal komite *Scrutiny of Bills*, sa enn ki travay lo tou bann Lalwa ki vin devan Lasanble, ki angaz avek Bann Minister e *Attorney General* pou eklersi konteni e langaz dan bann Prozedlwa pou asire ki deba dan Lasanble i lo merit sa Prozedlwa.

Sa komite i fondamantal pou asire ki Lasanble i fer en travay efektiv e san zot

Lasanble pa ti pou mars byen, e se pour sa ki mon donn zot sa remersiman spesyal.

Lannen pase enn bann moman spesyal pour nou sete selebrasyon 30enm laniverser Lasanble Nasyonal. Annefe sa selebrasyon in ganny marke avek plizyer aktivite apre diferan group. Manm, osi byen ki zofisye sekretarya.

In annan rankont avek bann group zenn, in annan vizit kot Lasanble e bann levennman partikilye. Tou sa avek bi pou fer nou Lasanble pli byen koni par nou piblik. Levennman santral ti en *symposium* lo nou Konstitisyon ki ti annan partisipasyon diferan brans Gouvernman. Legzekitiv, Lezislativ e Zidisyer.

I annan plizyer remark e sizesyon ki ti ganny fer enkli pour Lasanble, ki nou bezwen rebran e fer avanse pou ganny konsidere dan en posib revizyon Konstitisyonnel. Mon a sit enn par egzanp. Enn sete, ki Manm elekte proporsyonnelman i kapab ganny ogmante par rapor avek elekte direkteman pou reprezant en distrik.

Travay Lasanble pandan sa lannen in donn mwan lokazyon pou reflesir en pe plis lo sa propozisyon e mon krwar i enn ki annan vre merit.

Mon krwar ki bann rol *leadership* dan Lasanble.

Speaker e Deputy Speaker i devret ganny ranpli toultan par Manm proporsyonnel plito ki Manm Elekte pou en distrik. Sa i kapab aplik osi pou en *Leader* Lopozisyon e *Leader* Biznes Gouvernman.

Akoz tou sa bann Leaders dan Lasanble i annan en manda nasyonal e zot devret lib pou konsantre lo zot rol san responsabilite en distrik. Par kont dan lot kote, en Manm elekte pou en distrik i devret kapab donn tou son letan antye son distrik, plito ki bezwen donn en bon pe son letan en rol Nasyonal.

Plis Manm proporsyonnel dan Lasanble i a osi permet bann parti politik plis posibilite pou ekilibre reprezantasyon dan Lasanble.

Par egzanp nou rekonnet e nou pe rode ki devret annan plis madanm dan Lasanble e osi plis zenn. Nou osi oule ki bann group spesyal i ganny reprezante. En mannyer pou asir tousala se avek Manm proporsyonnel.

Mon krwar en logmantasyon Manm Proporsyonnel i a donn en pli bon reprezantasyon demokratik nou Lasanble.

Mon pou envit bann *Leaders* Lasanble atraver nou konsey pou diskit sa bann tel size koman en propozisyon pou revizyon Konstitisyon a lavenir. Mon konsyan ki sa

propozisyon i kapab ganny kritik ki nou pou zis ogmant nonm dimoun dan Lasanble e ogmant depans.

Me pou mwan, sa ki nou devret pe gete se ki sa i kapab fer pou lademokrasi dan nou pei e pou en Lasanble ki servi nou sistenm governans pli byen.

Lannen pase in annan pa mal kontrovers ler size saler pou bann lapwentman Konstitisyonnel in monte dan Lasanble. Nou'n vwar ki sa i en size ki vin politik fasilman e manm piblik sirtou i kapab obzekte okenn sizesyon logmantasyon.

Mon pa pou antre dan sa deba la. Me zis senpleman demann nou piblik pou konsider ki larzan ki nou bezwen depanse lo nou sistenm governans i en nesesite fondamantal ki person pa devret regrete.

Lasanble Nasyonal koman en brans Gouvernman i bezwen kapab atir bann zonm e fanm kapab, konpetan pou ranpli sa rol avek profesyonnalizm e lonnekte.

I pou en defayans pou nou demokrasi pou les bann pozisyon Konstitisyonnel perdi zot stati par rapor avek lezot lokipasyon ou profesyon dan lezot brans Gouvernman oubyen dan sekter piblik.

Parfwa dimoun i denigre politik ek politisyen. Me

sistenm politik ki nou depan lo la pou diriz gouvrenans nou pei e nou bezwen donn li respe e nou bezwen ganny bon dimoun partou pou servi nou demokrasi.

Lannen pase mon ti mansyonnen 2 size ki mon krwar Lasanble i devret pran pou avans son devlopman. Enn se ki nou vwar plis resours pou permet Manm Lasanble servi plis zot privez pou amenn Prozedlwa lo zot menm. Sa ki nou apel, *Private Members Bill*.

Sa i en privez ki nou Lasanble in servi tre rarman. Mon ti ankouraz Manm Lasanble pou regarde ki mannyer zot kapab fer sa plis. Me en lobstak fondamantal se ki sa demars i demann konesans e lekspertiz teknik e osi letan pou fer resers e preparasyon ki Manm Lasanble pa arive gannyen.

Pou permet nou avanse, mon pou angaze sa lannen pou regard nesosite ganny plis resours ki kapab siport Manm Lasanble pou fer sa.

Lot size sete lobzektif pou permet Lasanble realiz plis son lotonomi koman en brans Gouvrenman. Sa i en misyon ki nou'n met devan nou e nou bezwen kontinyen travay pou avans li. E i pa okenn lide revolisyoner ki pou boulders nou sistenm ki'n ganny preskrir dan nou Konstitisyon.

O kontrer i tandans ki tou pei pe pran koman en mezir fondamantal la demokrasi kot i egziste.

Brans Lezislatif i bezwen definir son rol klerman e asim tou son responsabilite otan ki posib an paralel avek Legzektiv avek Zidisyer.

Plis lotonomi pou Lasanble i vedir annan plis lendepandans lo kontrol son Bidze e son kad administratif. Definitivman i lekspektasyon e standar demokratik pou Lasanble annan en lotonomi respektab an menm tan ki nou mentenir en konformite dan bann prosedir ki nou swiv ansanm avek lezot brans Gouvrenman. Nou en brans otononm, me nou dan enn menm Gouvrenman.

Sa i bann size ki mon pou angaz bann *Leaders* atraver nou Konsey Lasanble pou diskite e regarde ki mannyer nou kapab fer avanse.

Revizyon nou kad legal i touzour en defi ki nou devre pran an kont. Lannen pase, nouvo *Law Commission* ki ti ganny kree dan sa Lasanble in lans lapel ki bann antite konsernen i soumet propozisyon pou revwar e reviz Lalwa ki konsern zot.

An repons mon'n propoze ki kad legal Lasanble ki egziste i ganny konsidere pou

revizyon. A laktyel nou annan 2 Lalwa ki ankadre Lasanble apard nou Konstitisyon. Enn i apel *National Assembly Privileges, Immunities and Powers Act* e lot i *National Assembly Members Emoluments Act*. Tou le de i date depi bokou lannen. E i klerman annan serten provizyon dan toulede ki nepli aplike.

Parey en kantite lezot Lalwa, zot devre ganny met a zour. Lideal, sa ki mwan mon ti a swete se ki i annan en sel Lalwa ki kouver Lasanble an antye e regilariz tou son fonksyon.

La ankor, mon pou envit bann *Leaders* pou aport latansyon lo la e gete ki propozisyon konkret nou kapab anmennen pou fer sa travay avanse.

Dan lannen ki'n pase nou'n reisi fer en pe progre lo nou fasilite fizik, nou batiman e lespas travay ki nou annan. Prensipalman nou'n konplet en nouvo younit akote pour nou bann servis administratif. Spesyalman *housekeeping, maintenance, stores* eksetera.

Staff dan sa bann departman pou kapab antre dan sa younit byento e zot ava annan en pe plis lespas e fasilite. I a ede adres

mankman lespas ki nou'n fer fas avek dan nou batiman.

Pour le moman i a permet nou aranz departman medya en pe pli byen me nou kontinyen annan lezot defi.

Kekfwa piblik pa realize ler zot pase lo semen e zot vwar nou batiman ki paret larz, byen gran e ki fer en zoli portre. Annefe batiman Lasanble Nasyonal i ase enpozan avek en stil tropik me mankman lespas pe vin plis an plis en kontrent pour nou. Avek letan ki'n pase, Lasanble Nasyonal in grandi an term travay ki nou fer. An mezir ki nou fer plis, nou anploy plis *staff* dan nou sekretarya. E par egzanz, sa 5 zofisye ki nou pou anloye sa lannen pou deservi bann komite, me lespas pou zot travay i manke.

Nou pou kontinyen avek demars pou realize en proze agrandisman batiman Lasanble ki pou konpri de batiman akote nou batiman orizinal e dan menm stil. Nou'n deza lannen pase prezant sa proze avek Minister Finans pour konsiderasyon e nou espere kapab komans avek preparasyon en plan byento.

Sa i en proze ki pou pran plizyer lannen. Me pli vit ki nou komanse, pli vitman ki

nou kapab aboutir avek en bon rezilta. Apard nou problemn lespas i annan osi lezot bezwen renovasyon e reparasyon.

Komansman sa lannen nou'n antreprann en proze refer lenstalasyon kominikasyon, sistenm kab e koneksyon pour nou servis *internet* e telefonn. Sa sistenm ti'n pas son laz e lannen pase ti pe donn nou problemn e nou *staff* ki konsernen ti komans bokou enkyet. Sa reparasyon in pran laplipar nou letan *recess* e travay lo lapar nou lekip *IT* in entans. Mon remersye nou *manager IT*, Vincent Quatre e son lekip ki'n pas bokou letan lo sa latas. E si nou servis kominikasyon i mars pli byen sa lannen i ava gras a zot travay.

Manm i okouran osi ki an se moman nou pe ganny pa mal problemn avek *tiles* ki pe kase dan diferan landrwa. Travay reparasyon in komanse dan landrwa ki'n deza ganny afekte, be nou bezwen antreprann en ranplasman konplet ki pou en travay ase konplike.

Lot gran defi se sanzman twatir ki pe rouye e komans koule par plas. Sa i en travay ki bezwen pran avek bokou planifikasyon e kekfwa nou

kapab antreprann sa dan *recess* a lafen sa lannen 2024.

Akoz mon mansyonn tousala? Se pou montre ki nou osi nou annan problemn gard nou lakaz en bon eta e nou bezwen moderniz nou bann fasilite fizik ki pe pas en letan ki ase konsiderab depi ler zot in ganny met anplas.

Me bi tousala byensir se pou permet nou travay al pli byen e nou ranpli nou rol a plen.

Mon remersye bann Manm pour zot travay lannen pase. Annefe, a lafen lannen nou ti rekonnet *long service* serten manm dan enn pti seremoni ki nou ti fer san gran piblisite. Me aköz mon atas bokou lenportans avek rekonnet servis bann Manm e nou bann *staff*, mon ti a kontan rebran ankor en remersiman pou zot ki'n mark sa *long service*.

Lo kote *staff* Sekretarya, bann ki'n fer plis ki 10 an i

Mrs Tania Isaac, nou Clerk,

Ms Petra Tirant, en zofisye dan nou departman dokimantasyon.

Ms Sheryl Ramgasamy, zofisye *accounts*.

E an plis ki 10 an, zofisye medya

Darel Atala in fer 11 an.

Ms Samia Lebon,
 Raporter in fer 12 an. E
 Jim David, Kordinater
 Proze in fer 12 an e
 Mrs Ghislaine
 Thelermont Zofisye kontabilite
 in fer 23 an.

Lo kote Manm Lasanble
 bann Manm ki'n fer 10 an i
 Onorab Norbert Loizeau,
 Onorab Sandy Arissol,
 Onorab Gervais Henrie e
 Onorab Clifford Andre.

Me an plis, bann ki'n fer plis ki
 10 an;

Onorab Sebastien Pillay,
 11 an.

Onorab Regina Esparon,
 13 an.

Onorab Bernard
 Georges, 16 an e

Onorab Waven William
 23 an.

Sa i rekonesans pour sa
 ki zot in fer deza. Me mon pe
 kont lo zot e lo tou lezot Manm
 e *staff* Sekretarya pou fer
 bokou plis. Mon fer lapel pour
 nou tou zwenn ansanm pou en
 lannen travay dir e prodiktiv.
 Mon fer en nouvo lapel pou
 nou ranforsi solidarite dan
 Lasanble e korperasyon tou
 Manm tou le de kote lasal.

Mon regret labsans
 lopoziyon dan sa seremoni
 louvertir ozordi akoz mon
 krwar sa i en moman kot nou
 ti kapab zwenn ansanm pou

onor Lasanble. Mon respekte
 zot drwa proteste kot i annan
 koz, me sa seremoni i en
 moman kot nou ti kapab
 montre linite.

Zis pou eksplik rezon ki
 mon'n ganny. Mon'n ganny
 dir ki i akoz mon *Party Leader*
LDS an menm tan ki mon
 Speaker. Sa size mon'n adrese
 dan Lasanble e mon pa pou
 repas lo la ankor.

Mon zis repet mon
 langazman pou servi Lasanble
 avek lobzektivite, enparsyalite
 e respe pou drwa tou Manm
 partou kot mon kapab. E si i
 arive ki mon aksepte serten
 defayans, mon aksepte. Me
 mon promet Lasanble ki sa i
 mon langazman sakre.

Lasanble Nasyonal i en
forum politik e enn ki
 konstaman dan regar piblik. I
 byen ki nou fer politik e ki nou
 koz pou enfliyans piblik an
 deor. Me sa ki nou bezwen fer
 plis e pli byen se pour
 konsantre lo responsabilite ki
 devan nou.

Lo travay ki nou fer pou
 soutenir en demokrasi vivan e
 bonn gouvèrnans nou pei. Nou
 bezwen donn nou sitwayen sa
 sertitid ki nou pe servi zot
 premye, avek tou nou leker e
 avek tou nou kouraz.

Alor, mon remersye tou
 Manm davans pou zot

partisipasyon e zot korperasyon dan sa lannen ki devan nou.

Mon remersye osi nou *staff* Lasanble ki donn nou en servis e sipor administrative ekselan. Non selman regilyerman pandan nou bann sesyon travay, me osi pandan bann lokazyon spesyal parey bann levennman ozordi.

Mon'n aprann apre en pe letan annan konfyans dan zot kapabilite, zot devouman pour sa bann lokazyon ki demann bokou travay ekstra e mon'n arete enkyet letan i annan en levennman ki pou prepare akoz mon konnen nou *staff* pou alaoter.

Mon kontinyen osi kont lo zot pou reste sa moter ki fer nou Lasanble fonksyonn byen e annord.

Mon annan konfyans ki lannen 2024 i en bon lannen pour Lasanble Nasyonal Sesel. Avek sa, mon annan plezir pou deklar nou sesyon Lasanble 2024 ouver. Mersi bokou.

(APPLAUSE)

MR SPEAKER

Manm Lasanble Nasyonal, zofisye, Manm Lopozisyon, mersi pou zwenn nou dan lasal. Lo nou program, nou annan en Seremoni Omaz pou

nou ansyen koleg Onorab Rosie Bistoquet. Mon apresye ki tou Manm in zwenn nou pou sa lokazyon e mon ankor enn fwa eksprim mon byenveni pou manm lafanmir Onorab Bistoquet e son bann pros ki'n zwenn nou pou sa lokazyon.

Alors nou zwenn pou sa omaz pou nou ansyen koleg Onorab Rosie Bistoquet, ki nou ti depoz dan later Simityer Mont Fleuri le 28 Desanm 2023.

Protokol Lasanble Nasyonal i annan sa prevwayans pou demande ki nou onor en Manm ki desede pandan letan ki i pe servi son manda avek en omaz dan premye zour ki Lasanble i vin an sesyon apre son lanmor.

Letan in pas vit e nou pe pran Lasanble Nasyonal San Onorab Bistoquet. Me sa omaz ozordi i a permet nou gard li parmi nou an *esprit*.

Annefe son plas in ganny dekore avek en bouke fler e son portre e sa i en senbol fizik ki i avek nou an *esprit* ozordi.

Mon pou komans sa seremoni avek en pti temwannayaz lo nou ansyen koleg e apre sa mon pou envit serten Manm Lasanble pou osi adres en omaz pou nou ansyen koleg.

Lavi Rosie Bistoquet i enn ki kapab enspir nou tou. En fiy ordiner ki par son lentelizans in ganny en ledikasyon onivo ki'n permet li antre dan en profesyon nob. Ki in servi byen.

In kalifye koman en nurse e apre ganny konesans e leksperyans dan en varyete domenn swen lasante.

Rosie ti en profesyonnel devoue, konsyansye avek en lanmour pou tou dimoun ki i ti servi.

Rosie ti osi annan kouraz antre dan politik. Son formasyon e leksperyans profesyonnel in donn li en bon baz pou antreprann son rol dan sa lenstitisyon ki annan en plas enportan dan gouvènanans nou pei.

Dan son misyon koman en Manm Lasanble Nasyonal in fer en gran kontribisyon dan nou travay, sirtou dan bann size sosyal, lafanmir, zanfan e tou sa ki tous lo size lasante in toultan premye dan son konsern.

Nou'n apresye son travay lo komite Lasanble koman *Chairperson* lo *HIV/AIDS and Sexual Reproductive Health* e osi koman *Chairperson* komite *Forum* Parlmanter *SADC* pou Devlopman Imen e Sosyal e pou Programm Spesyal.

Lo en nivo pli konpreansiv, Rosi in defann dwa imen, dwa fanm, dwa zanfan e dwa bann group vilnerab dan nou sosyete e dan rezyon Sid Lafrik.

Rosie ti en dimoun ki'n montre respe, lanmitye e zenerozite dan relasyon ki i ti annan avek nou. In aport valer imen e spirityel dan tou sa ki in fer.

Lanmor in pran Rosie avan ki in akonpli tou sa ki i ti kapab fer, me lanmor nou bezwen aksepte.

Par kont sa ki nou bezwen fer an retour se apresye son lavi. Sa ki in ete e sa ki in fer. Son fanmir i ava rapel li pour sa ki in ete pou zot. Nou dan Lasanble, nou ava rapel li koman en koleg ki'n anrisir non Konstitisyon par son prezans e son partisipasyon.

Sakenn antre nou i a kapab rapel Rosie pou enteraksyon ki nou'n annan avek li. Nou pou rapel en fanm ki brav, me ki ti annan en karakter dous e kalm.

I ti annan en liminite an menm tan ki i ti koz avek tou konviksyon ki i ti annan. I ti annan bokou lakonplisman, me in reste touzour modes. Nou annan bokou rezon pou selebre lavi Rosie.

Mon espere ki i a reste an *esprit* parmi nou pou bokou letan. Mon dir ankor enn fwa dan sa lokazyon, *adieu* Rosie, *Adieu* nou koleg ki nou'n apresye bokou.

Avek sa de mo, mon pou envit lezot Manm Lasanble pou adres en omaz pour nou koleg e mon pou komans avek Onorab Gervais Henrie, Deputy Speaker.

HON GERVAIS HENRIE

Mr Speaker e tou dimoun ki pe swiv sa seremoni spesyal ozordi. Mon pe pran laparol koman en Manm Lasanble ki'n annan en relasyon travay pros avek defen Onorab Bistoquet. Prensipalman lo en plan politik parti *LDS*.

Mon oule eksprim mon gratitud pour tou dimoun isi pour lefe ki nou'n vin ansanm pou mazin, onor e selebre lavi nou ser Mis Rosie. En lavi ki'n koup kour, trazikman. Me en lavi ki'n viv pou akonplir bokou.

En lavi ki'n tous leker bokou. Ki'n rankontre li avek lafeksyon, limour e dedikasyon sener dan tou sa ki i ti angaze avek.

Mon vin devan zot avek tout liminite pou admet ki lo en pwennvi personnel mon pa ti tro konn Mis Rosie. Mon pa

ti konnen konbyen zanfan i annan, lekel son zanfan e menm kote i reste, apard ki i ti reste La Point Larue.

Me li koman *Chairperson* Lasosyasyon Madanm Linyon Demokratik Seselwa, mwan koman Sekreter Zeneral Parti, nou ti koz bokou. Angaze dan diferan plan stratezi e aktivite e kominik bokou lo telefonn, *SMS*, *WhatsApp* e *email*.

Tou sa bann levidans i ankor la e mon pou garde pou touzour.

Mis Rosie, tou keksoz i ti met an ekir. Wi, sa i dir nou ki degre serye e metikile i ti ete avek lavi. Isi dan Lasanble, zis mon vir a gos mon vwar Mis Rosie. Dan nou *Caucus room* i ti asiz par devan mwan. Tou sa ki i ti tipe lo son *laptop* ouswa ekir lo son telefonn, mon ti kapab vwar. Son *font* ti toultan gro, me mon pa ti vey son zaksyon.

E zanmen mon a bliy nou dernyen konversasyon, kot nou ti pe reflexir ansanm lo plis partisipasyon bann madanm dan parti *LDS* e dan politik Sesel an zeneral pandan *meeting* egzekitiv parti *LDS* le 21 Desanm 2023, selman detrwa erdtan avan son lanmor.

E la tou dimoun dan parti i krwar dan

emansipasyon bann madanm, in perdi en alye senser dan sa demars.

Mr Speaker, depi lanmor mon Manman 1994 e mon Papa an 2011, mon pa ti ankor perdi personn dan mon serk lavi. Depar si vit Mis Rosie, in afekte bokou nou isi anndan emosyonnelman.

Nou bann dimoun ki annan leker e tanperaman pou pran bann desizyon difisil, parfwa menm kontroversyal. Me zanmen nou ti a mazin poudir nou pou kapab pler sitan. Menm ziska bomaten, realizasyon ki i nepli la. E ler mon bezwen ekrir sa, i desir mon leker.

Me nou dir li mersi. Mersi pou rapel nou ki nou senpleman imen apre tou. Pou montre lemosyon menm piblikman, mon ankor pe rapel mon bann koleg pe debout a kote mwan dan Katedral Imakile, fason ki zot ti pe santi sa zour.

Mersi Mis Rosie pou montre nou mannyer pou akeyir lavi avek nou de lebra ouver. Nou pou rapel ou koman en dimoun ki ti touzour pare pou ede. Ou ti ranpli avek konpasyon, menm si souvan ou ti annan en figir serye. Me pou bann ki ti pre avek ou i konnen ki ou ti

ranpli avek limour. Ou'n sok mwan en milyon fwa avek keksoz mon'n tann ou dir Onorab Zialor, Labonte, Labrosse ouswa Roucou.

Dan mon leker mon ti senpleman dir, Mis Rosie ou pa en pe tro vye pou dir sa bann parol. Me sa ti ou. Pou ou lavi ti en zoli kwen tapi avek kouler vibran, ris ek laform ek tekstir.

La nou pe al donn nou larepons SONA apartir semenn prosen. Nou pou mank sa bann lardon dan ou larepons ki menm Speaker, ti pou bezwen mele.

Toudmenm nou dir mersi Bondye Papa pou beni nou avek lavi Mis Rosie lo later. Ler nou pe dir *adieu* nou ser ozordi, annou mazin son lanmor, son sourir, son bann moman presye ki nou'n partaze avek li.

Mon priye ki sa bann memwar i reste vivan dan nou leker pou touzour. Ki nou trouv rekonfor ki aprezan i dan en landrwa kot son larm pe repoz anpe. Mersi.

MR SPEAKER

Mersi Onorab Henrie. Mon aprezan envit Hon Sandy Arissol. *Chief Whip LDS* pou rann en omaz.

HON SANDY ARISSOL

Mersi Mr Speaker. Bonswar mon bann koleg Manm Onorab. En bonswar spesyal pou lafanmir pros Mis Rosie ki'n ganny envite isi kot Lasanble Nasyonal. E tou bann dimoun ki pe ekoute.

Mr Speaker, se avek tou latristes e en leker lour, parey nou ti fer lannen pase. E mon ti a voudre prezant nou sener kondoleans lo lapar mon *Leader*, Onorab Georges. Tou mon bann manm *caucus* lo kote *LDS*. Lo non tou bann dimoun Point Larue ki ti kontan Rosie, ki ti travay avek Rosie. Espesyalman Daniela Arissol, en madanm ki ti mars avek Rosie, ki ti travay avek li ziska son dernyen zour.

Mon ti a kontan lo non sa bann dimoun, prezant avek lafanmir Rosie, son bann pros, nou sener kondoleans e nou senpati. Nou ti a kontan profite pou dir zot mersi, pou pret nou zot Manman, pou pret nou zot ser, zot tantin, pou vin dan sa travay politik ki parey nou, nou fer,.

Nou ti a kontan dir zot mersi pou son letan. Mersi pou son lanmour. Pou son leksperyans ki in partaz avek nou pandan son pti parkour. Son plas i la, i vid. Me lavi in fer ki i pa'n permet li pou li

zwenn nou 2024. Me i reste toultan dan nou leker. I reste en ser ki nou'n kontan. I reste sa Mis Rosie. Sa manman Rosie. Sa Onorab Rosie ki nou tou nou ti konnen.

E alors ankor enn fwa, ozordi mwan koman *Chief Whip LDS*, nou dir avek son fanmir. Nou prezant son fanmir, nou sener kondoleans e nou senpati. E mon swet tou mon bann Manm kouraz pou nou kontiny sa travay san Mis Rosie, me dan nou leker i reste koman nou ser sener, koman sa enn ki nou, nou ti kontan isi lo kote *LDS*.

Avek sa detrwa mo, mon ti a kontan remerci ou Mr Speaker.

MR SPEAKER

Mersi Onorab Arissol. Mon ti a kontan prezan envit Onorab Sylvanne Lemiel, *Chief Whip* pou *US* pou prezant en omaz. Onorab.

HON SYLVANNE LEMIEL

Mersi Mr Speaker. Bonn apre midi Mr Speaker. Tou mon bann koleg Manm Onorab. Manm fanmir defen Onorab Rosie Bistoquet e tou dimoun ki a lekout.

Mr Speaker, i en loner pou mwan lo lapar *caucus*

United Seychelles pou fer sa temwannayaz an memwar nou defen koleg, Onorab Rosie Anne Bistoquet.

En madanm farser, elegant, debouryer, otoriter e pasyonnen dan son travay, i serten fason ki nou dekrir defen Onorab Rosie Bistoquet.

Mazorite nou dan nou *caucus United Seychelles*, nou'n konn li dan son parkour e profesyon koman en ners tre kalifye. Bokou nou petet in pas atraver li pou serten servis medikal letan ki in travay kot Minister Lasante.

Parey bokou nou, nou konnen. Sa madanm in anmenn son kontribisyon pozitiv dan nou sistenm lasante letan ki i ti travay laba.

An Novanm 2020, nou'n konn li pli byen koman en koleg isi dan sa Lasanble Nasyonal.

Defen Onorab Rosie, in en Manm Lasanble tre devoue e touzour aktiv, espesyalman lo bann komite ki in deservi.

Mon menm, ansanm avek Onorab Audrey Vidot dan sa *caucus*, nou'n ganny sans travay tre pros avek li letan in lo *caucus* Madanm.

Lo sa komite i ti tre aktiv e toultan pe anmenn son kontribisyon. Lo bann lezot komite ki in deservi, i ti

touzour serye, disiplin e ferm. Onorab ti touzour anvi vwar keksoz bouze. Ler in komanse, fodre ki i fini. Pa zis fini koumsa, me fini byen.

Avek sa bon bagaz lenformasyon lo lasante ki i ti posede i ti souvan donn bann *advise* lo serten pti mo lasante ki en Manm ti kapab pe santi. Par egzanp a sak fwa ki ou ti koz avek li lo kek douler, i ti toultan donn son pwennvi e bokou fwa ler ou ti al kot dokter, sa ti ganny konfirman.

Sa madanm ti vremen pasyonnen lo size lasante. Nou kapab dir, nou'n perdi en *asset* ki ti annan bokou ankor pou kontribye isi dan sa Lasanble, menm dan sekter lasante lo sa lasosyasyon ki i ti *chairman*.

Mr Speaker, ankor enn fwa lo non *United Seychelles* e osi nou *caucus* isi dan sa Lasanble, nou oule eksprim nou senser kondoleans e senpati a tou son bann fanmir, koleg e zanmi.

Nou touzour priye ki son *âme* i repoz an pe.

Mon ti a kontan dedye sa pti *poem* pou defen Onorab Rosie Bistoquet, ekrir par Ms Genevieve Daniel.

Ki mannyer pou dekrir ou dan zis detrwa parol?

En latas vreman pa fasil pou akonpli.

Nou ankor mazine konmsi i ti yer menm.

Ou lavwa ti pe rezonnen dan nou *Chamber*.

Son leko ou a krwar i ankor pri par la dan en kwen.

En prezans ki'n vreman mark nou.

Ozordi en riban i dekor ou plas e ou sourir menm si i ankor eblouisan, i pri deryer en kadreman vit.

Me sa zour i reste ankor ou zour.

Menm si tre byento mark ou legzistans isi,

kot souvan nou'n agree e dezagree pou osi pran son lavol e al apoz dan liv listwar parlman.

Paz apre paz, marke avek lanprent en fanm kourazez avek bokou tenasite.

En fanm ki'n debout for lo son bann prensip, en fanm ki pa pou fasil oublie.

Mersi Mr Speaker.

MR SPEAKER

Mersi Onorab. Mon aprezan envit Onorab Regina Esparon.

Chairperson groupman Madanm dan Lasanble

Nasyonal Sesel pou rann son omaz.

HON REGINA ESPARON

Mersi Mr Speaker, pou donn mwan sa loportinite pou adres de mo an memwar nou defenser, Onorab Rosie Bistoquet.

Mon pran laparol apre midi koman *Chairperson* bann Madanm dan Lasanble avek en leker lour. Malgre ki nou konnen ki napa mo ki pou ganny dir ki pou kapab defer sa ki ti arive dan lannwit le 22 Desanm lannen pase. Kot ozordi i fer egzaktaman 2 mwan depi ki sa in pase.

Nou ti kit isi le 15 Desanm ansanm, an riyen e nou pa ti zanmen mazine ki ozordi nou pou retournen san ou Onorab Rosie.

E mon premye mo se pou retras ou memwar, sa parkour ki nou'n fer ansanm.

Mr Speaker, nou konnen ki i pou pran en pe letan pou ranpli sa vid ki son depar in kite e plis letan ankor pou soulaz sa douler separasyon e geri bann sikatris lo leker sakenn de nou. Sirtou bann ki ti pli pre avek li.

Sakenn de nou bann madanm isi dan Lasanble e lezot in konn Onorab Rosie dan son prop fason. E dan nou Komite Madanm, nou'n partaz

bokou ansanm, kot in toultan annan sa lapresyasyon pou bann kontribisyon valab ki in fer e kot i avans bann largiman pozitiv ki met bann dernyen zepis dan bann deba.

Depar Onorab Rosie in kas en mayon lasenn ki ti kit nou ansanm koman en Komite Madanm. Kot in toultan annan sa linite pou travay ansanm, pe enport lo ki kote latab nou ti sorti. Parski nou bi sete pou promouvwar lentegrite bann madanm dan nenport ki kous sosyete ou kad lavi ki ou sorti.

E i vremen difisil pou nou rebran san prezans Onorab Bistoquet, parski keksoz pa pou parey. Akoz i ti inik dan son fason panse e fer. Toudmenm nou ankouraze ki sa enn ki pou vin apre li a rebran larelev e a mars dan son lepa pou kontinyen kot in kite.

Bondye in tars ou semen Rosie e nou oblize aksepte e les ou ale. Letan ki nou, nou kontinyen navig dan sa lenpas vid ki ou depar in kite isi anba, nou swete ki kot ou ete ou a mazin nou bann madanm isi dan Lasanble, dan nou lalit pou etabli sa egalite *de genre* ant madanm avek msye.

E kot enn ou forte sete donn sans sak endividi pe enport ki son oriyantasyon

seksyel ou limitasyon pou montre son kapabilite.

Rosie pou ganny mazine pou sa ki i ti ete. Avek sa zwa de viv, serye kan fodre e riye letan nou zwenn dan en pti moman detant. Mersi pou tou sa ki ou'n kontribye anver *caucus* bann madanm. Ki swa lo nivo lokal, rezyonal ou enternasyonal. Kot nou'n fer bokou parkour ansanm, sirtou lo nivo *SADC-PF*. Kot nou'n osi en manm *Caucus* Madanm dan larezyon lo nivo Sid Lafrik. En lorganizasyon ki mwan mon a latet.

Mersi pou ou lanmitye, lankourazman e pti konsey pratik ki ou ti toultan pe ofer dan bann moman difisil. Mersi pou bann bon moman ki nou'n pas ansanm koman en lekip letan ou'n al reprezant nou pei aletranze.

Ou ti annan bokou rev Onorab Rosie ki ou pa'n kapab fini akonpli. Nou a konsol ek ou memwar, ek ou bann bon souvenir ki ou'n kit ek nou. Ki ou repoz dan lape e zet en regar lo nou isi anba.

Mr Speaker, les mwan fini par enn sa quote ki Onorab Bishop Adeyemi, en *Chief Whip* dan Lasanble Nizeryan. *'The bond between friends is always beyond the*

mortal world. You are gone from our sight but never from our heart'.

Nou pou kontinyen solider avek lafanmir dan lapriyer. *Adieu Rosie, fly high.* Mersi.

MR SPEAKER

Mersi Onorab. Mon aprezan envit Onorab Kelly Samynadin ki en Manm Komite *SADC-PF* e ki'n ranplas Onorab Bistoquet koman *Chairperson Forum dan Standing Committee, Human and Social Development and Special Programs.* Onorab Samynadin.

HON KELLY SAMYNADIN

Mersi Mr Speaker. Bonn apre midi Mr Speaker, tou mon bann koleg Onorab. Lafanmir e pros Onorab Bistoquet ki la avek nou ozordi. *Staff* Lasanble Nasyonal e tou dimoun a lekout.

I avek bokou lemosyon ki mon koze ozordi lo lapar *Forum Parlmanter SADC-PF*, an vi ki mon pe presed plas Onorab Bistoquet koman *Chairperson Human and Social Development and Special Programs, Standing Committee lo SADC-PF.*

Mis Rosie ti enn mon koleg madanm dan *Caucus*

LDS e dan Lasanble Nasyonal. In osi en manm dan nou parti.

Zis pou relev en pe le 22 Desanm 2023. Mon ti ganny en *call* 1er 3 bomaten par Onorab Michel Roucou e sa zour ti en pti pe drol pou mwan akoz mon pa ti pe kapab ganny sonmey. Mon ti la pe dous lo lili, pe vir vire. E letan mon ti ganny sa *call*, Onorab Michel Roucou ti demann avek mwan, ou'n tande ki'n arive, ou'n tann maler ?

Prezan mon demann avek li ki'n arive, i dir mwan Rosie. Mon demann li ki'n arive avek Rosie. I dir mwan in kit nou. Mon reste sezi, mon pa ni menm kapab koze. Mon demann avek li ki'n arive. I dir mwan aparaman in ariv en mert. Nou'n koze, mon'n koup telefonn.

Mon'n la pe asize e pou mwan mon pa ti ankor krwar, mon ti dan *disbelief*. Mon'n menm *call* son Clerk Daniella Arissol zis pou klarifye sa ki'n arive i vre.

Pli tar mon'n *call* Onorab Roucou ankor, mon'n dir avek li poudir mon anvi vwar Rosie. In dir mwan nou pe al desann la, nou pe al desann lakaz mor. Mon desann lakaz mor, mon asize mon espere dan

fernwar, ti napa personn. Mon asize mon espere. (*sobbing*)

Pli tar mon vwar korbiyar i arive e se la ki larealite i komans antre, poudir vre Onorab Bistoquet in kit nou.

Mis Rosie, ti en dimoun vremen devoue dan tou sa ki i ti fer e i ti pasyonnen dan son bann rol *Chairmanship* ki i ti annan, ki enkli byensir Komite *SADC-PF*, *HSDSP*, Komite *HIV/AIDS* dan Lasanble Nasyonal e byensir Lasosyasyon Madanm *LDS* e osi Lasosyasyon Ners Sesel.

Mon senpatiz ankor enn fwa avek lafanmir Onorab Bistoquet, ensi ki son bann pros. Mon swete ki Bondye i ava donn zot sa kouraz pou zot kapab kontinyen malgre ki in kit nou. Me byensir parey Mr Speaker in dir, i ankor la avek nou an *esprit*. E mon priye ki Bondye i ava donn lafors nou osi pou nou kapab kontinyen san li. Me mon konnen ki avek son memwar, souvenir ki in kit avek nou, nou pou kontinyen. Mersi Mr Speaker.

MR SPEAKER

Mersi Onorab. Mon aprezan envit Onorab Egbert Aglae ki ti Vice *Chairman* lo komite *HIV/AIDS and Sexual and Reproductive Health* ki son *Chairman* ti Onorab Rosie

Bistoquet e Onorab Aglae in servi koman *Vice Chairman*. Onorab.

HON EGBERT AGLAE

Mersi Mr Speaker. Mon a dir bonn apre midi tou bann Onorab. Bonn apre midi spesyal pou lafanmir e bann pros lafanmir Onorab Bistoquet. Tou *staff* Lasanble Nasyonal e tou bann dimoun ki pe ekout nou ozordi.

Mr Speaker, an memwar defen Onorab Rosie Bistoquet e lo non Komite Lasante Reprodiktiv e *VIH SIDA*. Nou dedye sa mesaz a son loner koman *Chairperson* Komite Maladi Kominikab *VIH/SIDA* e Lasante Reprodiktiv e Dwa Lasante.

En *Chairperson* ki'n fer bokou pou nou Sekter Lasante. En madanm Onorab ki'n persevere e met Sekter Lasante koman enn son priyorite dan tou nou travay Komite.

Defen Onorab Bistoquet in enn ki'n avans azanda *HIV/AIDS* e Lasante Reprodiktiv lo tou nivo; ki swa lokal, rezyonal e enternasyonal. I pa'n zanmen ezite pou avans dan tou direksyon pou koz lo dwa lasante avek tou kous nou sosyete. In en fanm brav ki'n

debout for dan son prensip pou fer bouze bann azanda atraver nou Komite Lasante isi dan sa Lasanble.

Nou ozordi salye tou son zefor e devosyon atraver tou son kontribisyon ki in avans devan. I pa'n zanmen per pou koze e dir kot i byen. E osi egalman, kot i mal in donn nide koman pou nou avans delavan.

Defen Onorab Bistoquet, in touzour en *team player*. Kot in pare pou ekoute e partaz son konesans avek bann Manm ki ti pli feb dan domenn ledikasyon lasante.

Nou osi rekonnèt son langazman, sirtou atraver bann akter kle dan Minister Lasante e osi sosyete sivil kot zot tou zot ti konn li. E zot ti konn son kapasite e i ti ganny bokou respe aköz i ti en fanm Onorab byen reserse e azour dan domenn lasante.

Zis detrwa zour avan son lanmor dan nou dernyen *meeting* Komite pou lannen 2023, i tin deza partaz serten nide pou nou program aktivite pou lannen 2024 e i ti partaz sa bann nide avek bokou pasyon e lantouzyazm. E an son loner, nou lo nivo komite, nou pou gard nou bann aktivite dan nou

program pou sa lannen avek son bann propozisyon.

Parey i ti kontan konplimant son komite e remersye nou koman en tim sak fwa ki nou termin en travay ouswa en *meeting*. Ozordi koman en komite nou rekonnèt tou sa ki i ti ete e tou sa ki in fer.

Labsans defen Onorab Bistoquet i osi en gran pert nasyonal e rezyonal. Son mark ki in kite pou reste agrave dan nou memwar.

Nou dir li mersi e ki sirman lekip e Lasanble Nasyonal pou mank son gidans. Nou komite Lasanble i dir ou mersi e adieu Onorab Bistoquet.

MR SPEAKER

Mersi Onorab. Mersi tou bann koleg ki'n rann sa omaz nou ansyen koleg. E mon espere ki sa i ava ed nou prezerv son memwar parmi nou.

Prezan koman en klotir pou sa levennman omaz, mon ti pou kontan apel en manm fanmir Onorab Bistoquet e sa se son garson, Jude Bistoquet pou zwenn nou pou nou prezant liv kondoleans ki Lasanble ti organize pou fineray Onorab Bistoquet e ki bokou manm piblik, ensi ki Manm Lasanble in sinyen. Mon espere ki sa zes i ava aport non selman klotir pou sa seremoni, me osi ki i ava

anmenn en pe klotir trazedi ki'n ariv nou e ki nou'n partaze koman lekip Lasanble Nasyonal.

Mon ava apel Jude Bistoquet, garson Onorab Bistoquet pou ariv devan silvouple. Mon ava apel nou *Sargent-at-Arms* pou prezant Mr Bistoquet avek sa liv kondoleans.

(The son of the Late Honorable Rosie Bistoquet was presented with the Book of Condolences by the Sergeant-at-Arms)

MR SPEAKER

Bon avan nou separe, nou ava obzerv en minit refleksyon an loner Onorab Bistoquet koman en dernyen *adieu*.

(The House observed one minute of silence for the late Honorable Rosie Bistoquet)

MR SPEAKER

Mersi. E nou pou envit lafanmir Onorab Bistoquet pou en sesyon portre, *photo* avek Manm Lasanble an deor batiman apre. Avek sa nou pou *adjourn* Lasanble e nou pou re pran 4 er pou nou lot *item* lo nou lord dizour ki sermantasyon de nouvo

Manm Lasanble. Mersi, Lasanble i *adjourn* ziska 4 er.

(BREAK)

MR SPEAKER

Bonn apre midi ankor. Byenveni pou bann nouvo viziter ki dan Galeri, ki bann envite de nouvo Manm Lasanble Nasyonal ki pou pran sermantasyon ozordi la. E nou a posede avek seremoni sermantasyon.

Nou ava apel bann Manm dan lasal dan lord alfabetik. Nou ava apel premye Ms Anne, Simone Bistoquet.

Nou a debout silvouple pou seremoni sermantasyon.

MS ANNE BISTOQUET

I Anne, Simone, Bistoquet do affirm that I would be faithful and bear true allegiance to the Constitution of Seychelles and that I will preserve, protect and defend the Constitution of Seychelles. So help me God.

(APPLAUSE)

MR SPEAKER

Ok. Onorab Bistoquet. Onorab silvouple reste dan lasal ziska ler nou pran lot sermantasyon.

E mon ava apel Ms Rachel, Joyceline Spiro.

MS RACHEL SPIRO

I Rachel, Joyceline, Spiro do swear that I would be faithful and bear true allegiance to the Constitution of Seychelles and that I will preserve, protect and defend the Constitution of Seychelles. So help me God.

(APPLAUSE)

MR SPEAKER

Mersi. Onorab Spiro i a pran son plas dan lasal.

Avek sa seremoni sermantasyon, Onorab Anne, Simone Bistoquet in zwenn *Caucus LDS* dan Lasanble Nasyonal e Onorab Rachel, Joyceline Spiro in zwenn *Caucus US* dan Lasanble Nasyonal. Onorab Anne Bistoquet in ranplas Onorab Rosie Bistoquet ki ti Manm Lasanble Nasyonal Proporsyonnel e Onorab Rachel Spiro in ranplas Onorab Wilbert Herminie ki ti manm Lasanble Nasyonal.

Mon swet labyenveni tou lede Manm Lasanble e byensir, mon krwar mon pe zis repet byenveni salere ki mon asire zot in gannyen lo lapar zot *Caucus*.

E mon konnen ki tou lede *Caucus* pou kontan vwar 2 nouvo Manm lo zot tim. Enn, sakenn lo zot tim.

E mon pou swet zot bon travay, bon partisipasyon dan Lasanble e mon espere ki

ansanm nou a kapab servi Lasanble Nasyonal e nou pei avek tou devouman e tou loner.

Mon remerisi zot pou zot partisipasyon. Mon remersye bann envite pou avek nou, pou siport zot pros koman nouvo Manm Nasyonal.

Avek sa nou pou *adjourn* e Lasanble pou repran 5er pou diskour Leta Lanasyon par Prezidan Larepublik. Nou *adjourn*.

(ADJOURNMENT)